



**Sud Bosne i Hercegovine**  
**Суд Босне и Херцеговине**

---

**Broj: S1 3 Iž 051738 25 Iž**  
**Sarajevo, 10.04.2025. godine**

Sud Bosne i Hercegovine u Sarajevu, u vijeću Apelacionog odijeljenja sastavljenom od sudija Zvezdana Antonović, kao predsjednika vijeća, Mirsade Džindo i Redžiba Begića, kao članova vijeća, odlučujući o žalbi Političke stranke HDZ BiH-Hrvatska demokratska zajednica Bosne i Hercegovine, izjavljenoj protiv Odluke Centralne izborne komisije Bosne i Hercegovine broj: 05-1-07-5-148/25 od 03.04.2024. godine, o utvrđivanju odgovornosti za vođenje preuranjene izborne kampanje, u nejavnoj sjednici, održanoj dana 10.04.2025. godine, donio je

**R J E Š E N J E**

Žalba se odbija.

**O b r a z l o ž e n j e**

Odlukom Centralne izborne komisije Bosne i Hercegovine, broj i datum navedeni u uvodu, utvrđeno je da je Politička stranka HDZ BiH-Hrvatska demokratska zajednica Bosne i Hercegovine odgovorna što je Darijana Filipović, pristalica i potpredsjednica ove političke stranke putem medija vodila izbornu kampanju u periodu preuranjene izborne kampanje, pa joj je na osnovu člana 6.7 stav (2) tačka 1) Izbornog zakona BiH i primjenom člana 19.9 stav (1) tačka 3) i stav (2) Izbornog zakona BiH izrečena novčana kazna u iznosu od 5.000,00 KM (slovima: pet hiljada konvertibilnih maraca)

Protiv navedene odluke Centralne izborne komisije (u daljem tekstu CIK BiH) žalitelj je blagovremeno izjavio žalbu u kojoj navodi da predmetna izjava po sadržaju i obliku nema karakter preuranjene kampanje i ne predstavlja eksplicitnu promociju kandidata navođenjem njihovih komparativnih prednosti kojim bi se uticalo na volju birača i motivisalo da podrže politički subjekt HDZ BiH. Nadalje navodi da se u spornoj izjavi ni na koji način ne spominje program stranke, niti bilo koji detalj vezan za predizborne aktivnosti stranke. Ističu da je izjava općenita, sadrži generičke pojmove koji se ne mogu podvesti pod kršenje odredbe člana 7.1 Izbornog zakona BiH niti bilo koje druge odredbe Izbornog zakona BiH. Navodi i da ovakvom odlukom Centralna izborna komisija BiH zauzima rigidan stav kažnjavanjem na bilo kakav komentar.

U odgovoru na žalbu Centralna izborna komisija Bosne i Hercegovine je predložila da se žalba odbije kao neosnovana.

Žalba nije osnovana.

Iz stanja spisa proizlazi da je CIK BiH Centralna izborna komisija Bosne i Hercegovine je dana 21.08.2024. godine putem e-maila zaprimila inicijativu za pokretanje postupka po službenoj dužnosti od strane Koalicije, "Pod lupom", a koja se odnosi na kršenje odredbe člana 7.1 Izbornog zakona Bosne i Hercegovine ("Službeni glasnik BiH". br. 23/01, 7/02. 9/02, 20/02.25/02, 4/04, 20/04. 25/05. 52/05. 65/05. 77/05, 11/06. 24/06. 32/07, 33/08, 37/08, 32/10, 18/13. 7/14, 31/16,41/20. 38/22. 51/22. 67/22 i 24/24) od strane političke stranke HDZ BiH-Hrvatska demokratska zajednica Bosne i Hercegovine. U inicijativi se navodi da je navedena politička stranka u izjavi za portal Klix.ba dana 08.07.2024. godine promovisala svoje kandidate, te na taj način vodila preuranjenu kampanju.

Iz stanja spisa nadalje proizilazi da je Centralna izborna komisija Bosne i Hercegovine, imajući u vidu odredbu člana 6.2 stav (1) Izbornog zakona Bosne i Hercegovine, u postupku ispitivanja formalno pravne strane podneska utvrdila da je ista podnesena od strane neovlaštenog lica, iz kojih razloga je u smislu Člana 6.2 stav (2) i (3) Izbornog zakona Bosne i Hercegovine predmetnu informaciju cijenila kao inicijativu za pokretanje postupka i postupak vodila po službenoj dužnosti.

Postupajući po navedenoj inicijativi. Centralna izborna komisija Bosne i Hercegovine je nakon prijema, u skladu sa zakonskom procedurom, aktom, broj: 05-1-07-1682-2/24 od 21.03.2025. godine inicijativu dostavila političkoj stranci HDZ BiH-Hrvatska demokratska zajednica Bosne i Hercegovine na izjašnjenje, u roku od 24 sata od prijema akta. Istim aktom. Centralna izborna komisija Bosne i Hercegovine je zatražila i izjašnjenje Darijane Filipović, potpredsjednice navedene političke stranke.

Na navedenu inicijativu, izjasnila se politička stranka HDZ BiH-Hrvatska demokratska zajednica Bosne i Hercegovine u kojoj navodi da je predmetna izjava data za portal Klix.ba sama po sebi uopštena i ne predstavlja vid prezentovanja pojedinca, niti skupine lica u svrhu Lokalnih izbora. Navodi da se u istoj ne spominje program stranke ili bilo koji detalj vezan za predizborne aktivnosti stranke, te da sporna objava ne sadrži nikakav vid promovisanja kandidata, programa stranke, već je ista uopštena.

Identično izjašnjenje dostavila i Darijana Filipović.

Uvidom u kompletan spis predmeta i dostavljene dokaze (link sa portala Klix.ba i snimak ekrana spornog teksta) te cijeneći izjašnjenje političke stranke HDZ BiH-Hrvatska demokratska zajednica Bosne i Hercegovine i Darijane Filipović. Centralna izborna komisija Bosne i Hercegovine je utvrdila da je politička stranka HDZ BiH-Hrvatska demokratska zajednica Bosne i Hercegovine odgovorna za kršenje člana 7.1 Izbornog zakona Bosne i Hercegovine, jer je Darijana Filipović. pristalica i potpredsjednica ove političke stranke putem medija vodila izbornu kampanju u periodu preuranjene izborne kampanje, iz kojih razloga je donijela pobijanu odluku.

Ovakva odluka CiK-a je pravilna i na zakonu zasnovana, iz slijedećih razloga.

Centralna izborna komisija BiH, je, uvidom u tekst objavljen dana 08.07.2024. godine na portalu Klix.ba pod naslovom „HDZ predao kandidatske liste, prijavljen 31 kandidat za načelničke i gradonačelničke pozicije" te sporni dio izjave Darijane

Filipović "Što se liče listi, one su jedan odraz politički prepoznatljivih imena, načelnika i gradonačelnika koji imaju kontinuitet u radu na tim pozicijama, koji su već ranije bili na tim pozicijama, ali išlo lako jedne nove energije, novih ljudi, ne nužno mlađih, ali i mladih. Sve to stvara sinergiju političke zrelosti i nove energije tako da ćemo imati što ponudili biračima za Lokalne izbore pravilno zaključila da je politička stranka HDZ BiH-Hrvatska demokratska zajednica Bosne i Hercegovine, vodila preuranjenu kampanju na način da je vršila promociju političke stranke i promociju svojih kandidata, iz čega proizilazi da je vršena izborna kampanja. Dakle, sporni dio sadržaja izjave sadrži jedan od zakonskih obilježja izborne kampanje, a to upoznavanje javnosti između ostalog sa kandidatima ove političke stranke („političke zreli ljudi sa novim energijama"). Dakle, biračima je ponuđeno šta mogu očekivati od navedene političke stranke za Lokalne izbore 2024, godine u smislu njenih kandidata, što nesumnjivo pokazuje da sadržaj spornog dijela izjave Darijane Filipović. nije bio uopšten.

Da sporna izjava nije bila uopštena i ne sadrži samo generičke pojmove jasno govori i naslov teksta „HDZ predao kandidatke liste, prijavljen 31 kandidat za načelničke i gradonačelničke pozicije" iz čega proizilazi da se radilo o upoznavanju birača sa kandidatskim listama podnosioca žalbe, a ne nekoj uopštenoj izjavi kako se to u žalbi pokušava predstaviti.

Odredbom člana 7.1 Izbornog zakona BiH propisano je da je u periodu preuranjene izborne kampanje zabranjeno je vođenje izborne kampanje u elektronskim, onlajn i štampanim medijima i putem društvenih mreža ili bilo koji oblik javnog oglašavanja kampanje. Ova zabrana ne odnosi se na organizovanje zakonitih zvaničnih skupova organa i događaja političkih subjekata u svrhe koje nisu kampanja.

U članu 1.1a stav (1) tačka 8) Izbornog zakona Bosne i Hercegovine propisano je da je „Preuranjena kampanja" svaki oblik radnji iz kampanje koje preduzimaju politički subjekti u periodu od raspisivanja izbora do perioda zvaničnog početka izborne kampanje.

Odredbom člana 9. stav (1) Pravilnika o medijskom predstavljanju i javnom oglašavanju političkih subjekata u izbornom periodu („Službeni glasnik BiH", broj 31/24) propisano je da u periodu preuranjene kampanje političkim subjektima je zabranjen svaki oblik radnje iz kampanje koje preduzimaju politički subjekti u periodu od raspisivanja izbora do perioda zvaničnog početka izborne kampanje. Stavom (2) istog člana propisano je da se zabrana iz stava (1) ovog člana, odnosi na upoznavanje birača i javnosti sa programom i kandidatima političkih subjekata za predstojeće izbore.

Odredbom člana 19.9 stav (1) tačka 3) Izbornog zakona BiH propisano je da će se novčanom kaznom u iznosu od 3.000.00 KM do 30.000.00 KM kazniče se politički subjekt za prekršaj ako on ili njegov kandidat u suprotnosti s članom 7.1, u periodu preuranjene izborne kampanje, izvrši radnju koja se smatra vođenjem izborne kampanje, dok je stavom (2) ovog Člana propisano da za prekršaj iz stava (1) ovog Člana koje počini pristalica političkog subjekta kazniče se taj politički subjekt.

Imajući u vidu citiranu zakonsku odredbu, proizilazi da je politička stranka HDZ BiH-

Hrvatska demokratska zajednica Bosne i Hercegovine odgovorna za radnje i postupke koje počinu pristalica političke stranke, a što Darijana Filipović svakako jeste. Provjerom u službenim evidencijama utvrđeno je da Darijana Filipović nije bila kandidat na Lokalnim izborima 2024.godine, ali je svakako pristalica u smislu zakonskih odredbi, obzirom da je imenovana potpredsjednica političke stranke HDZ BiH-Hrvatska demokratska zajednica Bosne i Hercegovine.

Samu visinu izrečene novčane kazne, ovo vijeće nije preispitalo, iz razloga što ista nije ni osporavana navodima žalbe.

Iz svih izloženih razloga ovo vijeće je osporenu odluku, ocijenilo u potpunosti pravilnom i zakonitom, slijedom čega je žalbu, primjenom odredbe člana 81. stav 1. Zakona o upravnim sporovima Bosne i Hercegovine („Službeni glasnik BiH“ broj 19/02 do 74/10) valjalo odbiti.

**PREDSJEDNIK VIJEĆA  
S U D I J A**

**Zvezdana Antonović**